



08 APR, 2025

Gangguan bekalan gas di beberapa kawasan di zon tengah

Harian Metro, Malaysia



Gangguan bekalan gas di beberapa kawasan di **zon tengah**

Putrajaya: Bekalan elektrik di Semenanjung Malaysia kekal stabil, manakala bekalan gas terganggu di beberapa kawasan di zon tengah susulan tragedi letupan paip gas di Putra Heights, Selangor pada minggu lalu.

Suruhanjaya Tenaga (ST) dalam satu kenyataan pada semalam memaklumkan insiden letupan paip gas turut menyebabkan gangguan bekalan di empat stesen jana kuasa utama di Lembah Klang iaitu Stesen Janakuasa

Connaught Bridge, Stesen Janakuasa Pulau Indah, Stesen Janakuasa Sultan Salahuddin Abdul Aziz (KEV) dan Stesen Janakuasa Putrajaya.

"Namun, bekalan elektrik di Semenanjung Malaysia dalam keadaan stabil dengan beberapa langkah mitigasi sudah dan akan diambil.

"Antara langkah mitigasi yang diambil termasuk pengoperasian secara optimum stesen-stesen jana kuasa sedia ada termasuk penjana

arang batu dan pemantauan permintaan dan perancangan penjana yang lebih terperinci merangkumi pelbagai senario risiko," menurut kenyataan itu.

Langkah-langkah mitigasi interim juga sedang diteliti secara berterusan dan pihak ST akan menganjurkan sesi libat urus dengan pengguna yang terjejas dalam tempoh ter-

dekat.

Sementara itu, menurut suruhanjaya berkenaan bekalan gas di Semenanjung Malaysia terganggu di beberapa kawasan di zon tengah iaitu Shah Alam, Klang, Serdang, Puchong, Batu Tiga dan Kapar serta beberapa kawasan di zon utara.

"Pengguna yang terkesan sudah mula menerima

notis gangguan daripada pembekal masing-masing dan gangguan dijangka hingga 20 April.

"Bekalan gas masih ada dalam kuantiti yang terhad dan keutamaan diberikan kepada perkhidmatan kritikal seperti hospital dan penjaan elektrik, serta keperluan untuk menstabilkan tekanan paip gas," menurut kenyataan itu.

ST dengan kerjasama beberapa pihak berkepentingan utama dalam sektor pembekalan gas dan

elektrik, sedang memantau secara terperinci situasi pembekalan elektrik dan gas di Semenanjung Malaysia.

"Usaha kini tertumpu kepada menilai kesan gangguan bekalan gas, langkah-langkah mitigasi dan pelan interim dengan mengambil kira pelbagai senario sehingga keadaan pulih.

"Insiden kebakaran paip gas ini merupakan insiden terencil di Semenanjung Malaysia," menurut kenyataan itu.

“
Bekalan elektrik di Semenanjung Malaysia dalam keadaan stabil
ST